

65. Cum pietatem defenderet ab interpellationibus, fortunasque a furibus, ordines æque ac tribus pro sua quisque parte sextantem ei reddebant.

66. Terra in fodinis gemmas procreans, in campis fruges, in sylvis elephantos, animum ei ostendebat protectioni consentaneum.

67. Ille, KÁRTIKEYAM robore æquans, bene intelligebat, quodnam sex illorum sive subsidiorum, sive copiarum adhibendum esset ad inceptum aliquod peragendum.

68. Ita justo ordine quadruplicem prudentiam regiam adhibens, percipiebat illius fructum, qui a nemine familiarium irritus reddebatur.

69. Erga illum, qui, quamquam dolosæ pugnandi rationis gnarus, tamen non nisi honeste pugnabat, Fortuna Victrix, virorum fortium amans, amicæ instar se gerebat.

70. Quia plurimorum ejus hostium potestas fracta erat, raro tantum ille bellum suscipiebat, elephanti instar qui odore suo reliquos elephantos dispulit.

71. Luna, quando ad plenitudinem pervenit, decrescit, eandemque legem sequitur oceanus: ATITHIS eodem modo ac ambo illi incrementum quidem capiebat, non vero ut illi decrescebat.

72. Homines probi atque egeni, si ad magnum illum petentes aggressi fuerant, veluti nubes ad oceanum, ipsi largitores evadebant.

73. Ille laudanda suscipiens, si laudabatur, erubescibat; tamen augebatur gloria ejus, quamquam laudatores odio habebat.

74. Peccatum solo adspectu tollens, tenebras veritatis sensu dispellens, ut sol ortus, homines suæ voluntati subiciebat.

75. Lunæ radii haud penetrant in Nelumbium, neque solis radii in Nymphæam; sed virtutes illius viri præclari in hoste etiam locum inveniebant.

76. Quamquam omne ejus studium intentum erat ad hostes suos vexandos, tamen hoc etiam probum erat, quia ad sacrificium equinum peragendum victoriam appetebat.